

# ¡ B E L E N Á !



Ni joan mezetara  
 Gabaren erdian,  
 Kantak eta musikak  
 Entzunik kalia;  
 Pensaturik sufritzen  
 Dagon familian  
 ¡Zér malkoak ísurtzen  
 Diran bitartian!

Gauza zuri bat nuen  
 Ikusi aurrian,  
 Zan aur jaio berri bat,  
 Bildua zapian,  
 Arkitzen zana ¡bakar!  
 Botia lurrian,  
 Los-arri puska gogor  
 Otz baten gañian!

¡O aurcho chiki gaišo  
 Iñork ez maitia,  
 Jaio beste mancharik  
 Batere gabia!  
 ¡Zéiñ beltza ageri dan  
 Zure suertia  
 Amarik ezagutzen  
 Ez dezun umia!

¡Atoz, atoz enecho!  
 Ta guazen aurrera,  
 Zu bezelakoak ¡ai!  
 Or duten echera;  
 Ortikan ere kantak  
 Datoz gaur kalera,  
 ¿Ez digute esaten  
 —Onera, onera?—

Ta ¿nór da datorrena  
 Korrika atera,  
 Itzikan esan gabe  
 Zu neri kentzera,  
 Far-irri samur batez  
 Begiratutzera,  
 Malko eder bat joanik  
 Arpegian bera?

Gorputzeko ichuraz  
 Da emakumia,  
 Besteak bezelañen  
 Aragiz jantzia;  
 Izanik aingeru bat,  
 Aiñ choragarria,  
 Non Zeru-Lurrak dauden  
 Esanaz— ¡neria!—

¿Nórena zera bada  
 Zu orren maitia?  
 —¡O!... Aur jaio berri bat  
 Da nere Jabia,  
 Aizpa bat det: izena  
 Du Karidadia,  
 Ta gure eche au da  
 Pozaren kabia!

¿Ta zu, gizona, zaude  
 Naigabez betia?  
 Sartu zaitetz barrena,  
 Konsolazaitia!  
 ¡Ara! ikusi zazu  
 Gure familia,  
 Emen aurra, or zarra,  
 An berriz eria!

¡Begira zér kontentuz,  
 Bakoitzak beria,  
 Daramaten guztiak  
 Beren gurutzia!  
 Esperantzaz beterik,  
 Pizturik fedia,  
 ¡O!... gozoa da onla  
 Zerbait sufritzia!

Ikusi zazu orain  
 Gure Nagusia,  
 Belengo portalera  
 Zerutik jachia;  
 Gizon batzuek Aur au  
 Ez ezagutzia  
 ¡Zér gauza tristia dan!  
 ¡Zér negargarria!—

Karidadeko monjak

¡JESUS! ikustia

Ta belaunikaturik

Ísill gelditzia

Guztia bat izan zan:

. . . . .

¡O JESUS aundia!

¿Naizu arren ondoan

Nik adoratzia?

ANTONIO ARZÁC.

